

CONVENIO DE COLABORACIÓN ENTRE O SERVIZO GALEGO DE SAÚDE E O CONCELLO DE OURENSE PARA O FINANCIAMENTO DA EXECUCIÓN DAS OBRAS DA FASE I DA REPROGRAMACIÓN FUNCIONAL DO COMPLEXO HOSPITALARIO UNIVERSITARIO DE OURENSE, COMPLEMENTARIO AO CONVENIO DE 17 DE DECEMBRO DE 2021

MEMORIA XUSTIFICATIVA

A xerente do Servizo Galego de Saúde, DECLARA:

Que o Servizo Galego de Saúde formalizou, o 23.12.2022 co Concello de Ourense, o instrumento convencional arriba referido, que terá a mesma vixencia que o convenio asinado o 17 de decembro de 2021 ao que complementa.

Que o instrumento convencional ten por obxecto:

Regular a concesión da subvención nominativa prevista no convenio de colaboración entre o Concello de Ourense e o Servizo Galego de Saúde de 17 de decembro de 2021, a favor do Servizo Galego de Saúde e por importe de 1.103.497,80 euros, destinada ao financiamento da execución das obras correspondentes á Fase I da reprogramación funcional do Complexo Hospitalario Universitario de Ourense.

Que existe converxencia de intereses entre as entidades asinantes en orden á consecución do obxectivo referido.

Que o instrumento convencional que se asinou se fundamenta no seguinte:

No ano 2003 aprobouse o Plan Director do Complexo Hospitalario Universitario de Ourense, que respondía a un estudo integral das necesidades asistenciais dos recursos existentes e das melloras que era preciso introducir para acadar un nivel de calidade óptimo na atención sanitaria á poboación da provincia de Ourense. Tratábase dun proxecto de grande envergadura, que ía máis aló dunha simple remodelación dos edificios existentes.

Ao longo deste anos foron acometéndose as obras correspondentes á execución do edificio do Bloque Cirúrxico e do edificio da nova Hospitalización.

Porén, nestes últimos anos xurdiron novas necesidades que non estaban recollidas no Plan Director, polo que, foi preciso que o Servizo Galego de Saúde realizase unha reprogramación funcional do plan, que por unha banda permita desbloquear as obras de reforma pendentes e por outra se adapte ás novas necesidades.

O Servizo Galego de Saúde elaborou e aprobou un proxecto básico das obras da fase I da reprogramación funcional do Plan Director do CHUOU, que foi remitido ao Concello de Ourense no mes de xuño de 2020, co fin de proceder á súa aprobación polo procedemento previsto na Lei 3/2016, de 1 de marzo, de medidas en materia de proxectos públicos de urxencia ou excepcional interese. O orzamento de execución material das obras previsto no proxecto cífrase en 33.739.685,05 euros.

O dito proxecto foi informado favorablemente pola Xunta de Goberno Local do Concello de Ourense, mediante acordo de data 25 de febreiro de 2021, para a súa posterior aprobación polo Consello da Xunta de Galicia.

Dado o elevado importe das actuacións a realizar, tendo en conta o seu impacto social e económico para a cidade de Ourense e partindo do principio xeral de cooperación e colaboración entre administracións públicas recollido no artigo 3.1.k) da Lei 40/2015, de 1 de outubro, de réxime xurídico do sector público, o Servizo Galego de Saúde solicitou a cooperación económica do Concello de Ourense coa administración sanitaria para o financiamento e execución dos investimentos de referencia.

Inicialmente o Servizo Galego de Saúde propuxo ao Concello de Ourense a regulación, a través das correspondentes ordenanzas fiscais, dos seguintes beneficios fiscais:

- Dunha banda, unha bonificación do 95% da cota do Imposto de Construcións, Instalación e Obras dos investimentos a realizar na fase I, cota que será o resultado de aplicar o tipo de gravame do 2,6 % ao custe real e efectivo das obras, calculado conforme ao previsto no artigo 102 do Texto Refundido da Lei reguladora das Facendas Locais, aprobado por Real Decreto Lexislativo 2/2004, de 5 de marzo (TRLFL, en adiante). O fundamento legal desta bonificación atópase no disposto no artigo 103.2.a) do TRLFL.
- Doutra banda, a exención do Imposto de Bens Inmóveis, durante un prazo de seis anos, en favor dos centros sanitarios de titularidade da Comunidade Autónoma de Galicia ou do Servizo Galego de Saúde no municipio de Ourense. O fundamento legal desta exención atópase no disposto no artigo 62.3 do TRLFL.



Logo do seu estudo por parte da Concellería – Delegada da Área de Facenda do Concello de Ourense, esta proposta inicial foi desbotada, dado que afectaría á previsión de ingresos dos exercicios 2021 e seguintes do Concello de Ourense. Dende o goberno local, propúxose como fórmula alternativa, a concesión ao Servizo Galego de Saúde dunha subvención nominativa polo importe dos beneficios fiscais solicitados pola administración sanitaria, proposta que foi aceptada.

O cálculo da contía da subvención realizouse considerando dous importes, por un lado a exención do IBI, dos inmobles dedicados a centros de saúde titularidade do Servizo Galego de Saúde ou da Comunidade Autónoma, por un prazo de seis anos. E por outro a bonificación do 95% do ICIO correspondente ás obras da fase I.

En consecuencia, a achega financeira ou subvención do Concello de Ourense ás obras sería de 4.125.062,98 euros.

Paralelamente, procedeuse á negociación do convenio. Durante a dita negociación, o Servizo Galego de Saúde comunicou ao Concello que no exercicio 2021 a cota tributaria do IBI correspondente ao Complexo Hospitalario incrementárase (como consecuencia da incorporación ao valor catastral das obras de ampliación realizadas nos últimos anos) pasando dunha cota de 366.721,49 euros (que fora a considerada para o cálculo do importe da subvención) a 550.637,79 euros. Isto implicaba, conforme ás bases de cálculo utilizadas, a necesidade de incrementar o importe da subvención na contía de 1.103.497,8 euros. Ao non ser posible a concesión dese importe no exercicio 2021, dado que o crédito dispoñible limitábase aos 4.125.062,98 euros inicialmente calculados, acordouse incluír no convenio o compromiso de dotar orzamentariamente e conceder, no exercicio 2022, unha subvención complementaria por importe de 1.103.497,80 euros.

O 17 de decembro de 2021, o Concello de Ourense e o Servizo Galego de Saúde subscribiron o convenio para o financiamento da execución das obras da fase I da reprogramación funcional do Complexo Hospitalario Universitario de Ourense, en virtude do cal o Concello de Ourense concedeu ao Servizo Galego de Saúde unha subvención de catro millóns cento vinte e cinco mil sesenta e dous euros e noventa e oito céntimos (4.125.062,98 euros) euros para o financiamento das ditas obras.

Na súa cláusula 2ª, parágrafo terceiro, o Concello asumía o compromiso de "dotar orzamentariamente e tramitar, no exercicio 2022, unha subvención complementaria por importe de 1.103.497,80 euros para a mesma finalidade".



Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de Contratos do Sector Público pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de abril de 2014, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2 da Lei 1/2016, do 18 de xaneiro, de transparencia e bo goberno, estimouse xustificado acudir á sinatura do instrumento convencional, con exclusión doutras figuras.

E para que conste, asínase esta memoria

